



Pranuar / Datedur Propozim / Escalado Recepçion / Received	01.12.2022	2	viti god year
Organ / Njësia Organ / Jedinstvo Org. Unit	Nr. Prop. Dr. No. Dr. No.	Shtori / Prilog Appendix	Sasia Kolicina Quantity
SKIMSHKEX	7516/2022		1/4



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS NEZAVISNI NADZORNI ODBOR CIVILNE SLUŽBE KOSOVA INDEPENDENT OVERSIGHT BOARD FOR THE CIVIL SERVICE OF KOSOVO

A.nr.917/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Arben Mehmeti -kryetar, Malsore Gashi-Bajraktari dhe Eshref Shabani-anëtarë, me Ardita Perçuku-Shyti-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën me numër A.nr.917/2022 të datës 14.10.2022 të parashtruar nga ankuesi [redacted] me adresë banimi [redacted] Komunën e Mitrovicës, kundër organit të punësimit Agjencia e Ushqimit dhe Veterinarisë, në çështjen juridike "kërkesë nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1, Nenin 16 paragrafin 3 dhe Nenin 18 paragrafin 1 nën paragrafin 1.3 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 01.12.2022, njëzëri, mori këtë:

V E N D I M

- I. Aprovohet pjesërisht *si e bazuar* ankesa me numër A.nr.917/2022 e datës 14.10.2022 e parashtruar nga ankuesi [redacted] lidhur me harmonizimin e koeficientit nga gjashtë (6) në tetë (8).
- II. Refuzohet pretendimi i ankuesit lidhur me kompensimin e diferencës së koeficientit në mënyrë retroaktive nga data 01.08.2021.
- III. Obligohet Kryeshefi Ekzekutiv i Agjencisë së Ushqimit dhe Veterinarisë, që brenda afatit prej pesëmbëdhjetë (15) ditësh nga data e pranimit të këtij vendimi, të inicioj veprimet e nevojshme ligjore për harmonizimin e koeficientit të nëpunësit civil [redacted] nga koeficienti gjashtë (6) në koeficientin tetë (8).
- IV. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim lidhur me veprimet e ndërmarra për zbatimin e këtij vendimi.

A r s y e t i m

Ankuesi [redacted] është i punësuar në Agjencinë e Ushqimit dhe Veterinarisë, sipas Akt emërimit me numër 7199/1 të datës 20.10.2021 në pozitën "Inspektor sanitar", në Drejtorinë e Inspektoratit-Sektorit i Inspektoratit.

Me datën 05.09.2022 përmes shkresës me numër Nr.6789, i është drejtuar me kërkesë Zyrës së Personelit në Agjencinë e Ushqimit dhe Veterinarisë, lidhur me harmonizimin e koeficientit nga gjashtë (6) në tetë (8) si dhe kompensimin retroaktiv të pagës nga data e vendimit të transferimit 01.08.2021. Ndërsa Njësia e Burimeve Njerëzore të kësaj agjencie me datën 15.09.2022 përmes e-mailit zyrtar është përgjigjur në atë drejtim duke theksuar faktin se Agjencia e Ushqimit dhe Veterinarisë është duke bërë përpjekje maksimale për realizimin e kërkesës lidhur me harmonizimin e koeficientit për inspektorët e kësaj agjencie.

I pakënaqur me përgjigjen e Agjencisë së Ushqimit dhe Veterinarisë konkretisht Zyrës së Burimeve Njerëzore, me datën 20.10.2022 ka parashtruar ankesën me numër të protokollit 6187/2022 për në Këshillin e Pavarur Mbikëqyrës për Shërbimin Civil të Kosovës, me pretendimet ankimore për harmonizimin e koeficientit nga gjashtë (6) në tetë (8) lidhur me pozitën si inspektor, që i njëjti të trajtohet me pagë dhe kompensime në mënyrë të barabartë sikurse trajtohen nëpër institucione të tjera dhe se i njëjti kërkon kompensimin retroaktiv të pagës nga dita e vendimit të transferimit me datën 01.08.2021 nga Komuna e Mitrovicës në Agjencinë e Ushqimit dhe Veterinarisë.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datën 20.10.2022 ka proceduar kërkesën për përgjigje në ankesë me numër të protokollit 6322/2022 në Agjencinë e Ushqimit dhe Veterinarisë. Ndërsa Këshilli, me datën 01.11.2022 ka pranuar përgjigjen në ankesë së bashku me shkresat e bashkëngjitura të lëndës nga Agjencia e Ushqimit dhe Veterinarisë.

Me datën 25.11.2022, Kryetari i Këshillit të Pavarur Mbikëqyrës për Shërbimin Civil të Kosovës, ka nxjerrë Vendimin VK.nr.172/2022 sipas të cilit i është vazhduar afati ankesës së ankuesit edhe për dhjetë (10) ditë pune.

Kolegji për Shqyrtimin dhe Vendosjen e Ankesave, për vërtetimin e plotë dhe të drejtë të gjendjes faktike si dhe vendosjes në mënyrë meritore, ka administruar këto prova: Ankesën me numër të protokollit 6187/2022 të datës 14.10.2022 të parashtruar nga ankuesi në Këshillin Pavarur Mbikëqyrës për Shërbim Civil të Kosovës; Kërkesën me numër të protokollit 6789 të datës 05.09.2022 e parashtruar nga ankuesi në AUV; Vendimin Nr.7199 të datës 20.10.2021 lidhur me transferimin e ankuesit nga Komuna e Mitrovicës në Agjencinë e Ushqimit dhe Veterinarisë ;E-mailat zyrtar të datës 26.09.2022, 22.09.2022, 15.09.2022; 01.04.2022, 09.03.2022, 07.03.2022, 02.03.2022, 26.07.2022, 22.06.2022, 20.06.2022, 10.06.2022, 31.10.2022, 27.10.2022, 24.10.2022, 19.08.2022; Kërkesën për përgjigjen në ankesë të datës 20.10.2022 nga Këshilli i Pavarur Mbikëqyrës për Shërbimin Civil të Kosovës; Përgjigjen në ankesë të datës 01.11.2022 nga Agjencia e Ushqimit dhe Veterinarisë lidhur me provat e bashkëngjitura të lëndës; Akt emërimit e ankuesit me numër Nr.7199/1 të datës 20.10.2021 se bashku me përshkrimin e detyrave të punës të datës 01.06.2011; Kërkesën me numër Nr.5527 të datës 26.07.2022 lidhur me harmonizimin e koeficienteve për inspektorët e AUV; Formularin e shpenzimit të departamentit, divizionit ose sektorit lidhur me planifikimin e buxhetit për vitin 2022 për AUV; Shkresën zyrtare me numër

Nr.1444 të datës 28.03.2014 lidhur me procedimin e shtesës sipas pozitës nga MAP për AUV si dhe Vendimin me numër VK.nr.172/2022 të datës 25.11.2022 nga Këshilli i Pavarur Mbikëqyrës për Shërbimin Civil të Kosovës.

Kolegji për shqyrtimin dhe vendosjen e ankesave, pasi ka shqyrtuar të gjitha shkresat e lëndës të parashtruara nga palët, ka vërtetuar se ankesa e ankuesit [redacted] është pjesërisht e bazuar, sepse:

Lidhur me pretendimin ankimor të ankuesit për harmonizim të koeficientit të pagës për pozitën "Inspektor Sanitar", Kolegji ju referua nenit 19 të Ligjit Nr.06/L-114 për Zyrtarët Publikë më të cilin është përcaktuar se: "Zyrtari publik ka të drejtë në pagë dhe shpërblim për punën e kryer si dhe shtesa të përcaktuara me Ligjin e Pagave", si dhe nenit 3 paragrafit 2 të Ligjit Nr.03/L-147 për Pagat e Nëpunësve Civilë më të cilin parashihet se: "Institucionet e administratës publike të Republikës së Kosovës janë të detyruara të paguajnë pagë të njëjtë për punën me vlerë të njëjtë". Andaj, mbi këtë bazë ligjore e nisur nga konstatimi si më lartë se ankuesi është emëruar në pozitën Inspektor Sanitar me koeficient gjashtë (6) të pagës, si dhe duke u bazuar në shkresën e datës 19.08.2022 të Departamentit për Menaxhimin e Zyrtarëve Publik si organ përgjegjës për përgatitjen dhe mbikëqyrjen e zbatimit të politikave për pagat e zyrtarëve publikë, me të cilin është konfirmuar se pozita inspektor-klasa profesionale 1, ka të përcaktuar koeficientin tetë (8) të pagës, Kolegji i Këshillit konstaton se pretendimi ankimor i ankuesit për harmonizimin të koeficientit të pagës me titullin e punës është i drejtë dhe i ligjshëm.

Kolegji i Këshillit për vendosjen meritorë të kësaj çështje juridike, ka analizuar edhe nenin 7 të Ligjit Nr.03/L-147 për Pagat e Nëpunësve Civilë me të cilin është përcaktuar se: *1.Udhëheqësit e institucioneve të administratës publike ia propozojnë gradat e pozitave në institucionin e tyre ministrisë përgjegjëse për administratë publike, në bazë të rekomandimeve të personit përgjegjës për burime njerëzore në institucionin e tyre, i cili është përgjegjës për zbatimin e standardeve dhe procedurave për klasifikimin e vendeve të punës në Shërbimin Civil. 2. Grada për secilin pozicion të punës dhe ndryshimet, miratohen nga Qeveria, me propozim të institucionit përkatës dhe aprovimit paraprak të ministrisë përgjegjëse për administratën publike dhe ministrisë përgjegjëse për financat....* andaj, në kuptim të dispozitave ligjore si më lartë dhe duke u bazuar në shkresat e lëndës, Kolegji konstaton se organi i punësimit në këtë rast Agjencia e Ushqimit dhe Veterinarisë ka ndërmarrë veprimet e nevojshme për harmonizimin e koeficientit të ankuesit, duke bërë kërkesë në ministrinë përgjegjëse lidhur me ekzekutimin për nivelizimin e koeficientit të pagës, mirëpo që kjo e fundit nuk ka ekzekutuar kërkesën në fjalë, andaj mbi bazën e kësaj gjendje faktike, Kolegji me të drejtë vlerëson se ankuesi në kuptim të realizimit të së drejtës së pagës, vazhdon të trajtohet në mënyrë më pak të favorshme se sa nëpunësit civilë të cilët ushtrojnë pozitë të njëjtë të punës në institucionet tjera publike, rrjedhimisht nisur nga ekzistimi i këtyre fakteve rezulton së aplikimi i koeficientëve jo të njëjtë të pagës për pozita të njëjta të punës, paraqet trajtim jo të barabartë dhe diskriminues të stafit dhe një veprim/mosveprim i tillë i organit kompetentë është në kundërshtim me nenin 3 të Ligjit Nr.03/L-147 për Pagat e Nëpunësve Civil si dhe me dispozitat e Ligjit Nr.05/L-021 për Mbrojtje nga Diskriminimi përkatësisht nenin 4 paragrafi 1 ku përcaktohet se "Diskriminimi i drejtpërdrejtë konsiderohet kur një person trajtohet në mënyrë më pak të favorshme sesa trajtohet, ka qenë i trajtuar ose do të trajtohet një person tjetër në një situatë të krahasueshme, sipas një apo më shumë nga bazat e përcaktuara në nenin një (1) të këtij Ligji.



Bazuar në shkresat e lëndës respektivisht në përgjigjen e dorëzuar nga organi i punësimit, Kolegji ka shqyrtuar edhe shkresën me numër të protokollit 1444 të datës 28.03.2014 me të cilën Drejtori i DASHC-së pranë Ministrisë së Administratës Publike i është drejtuar Menaxherit të Personelit si dhe Zyrtarit Kryesor Financiar, duke sqaruar pozitën e Inspektorëve se janë të planifikuara mjetet buxhetore atëherë pozita e punës inspektor duhet që të nivelizohet dhe paga bazë të jetë e njëjtë për Inspektorët e Agjencisë së Ushqimit dhe Veterinarisë gjegjësisht me koeficient të njëjtë tetë (8).

Ndërsa lidhur me pretendimin ankimor të ankuesit për kompensimin në mënyrë retroaktive të koeficientit të pagës për pozitën "Inspektor Sanitar" duke filluar nga data 01.08.2021 e tutje, Kolegji bazuar në provat e kësaj çështje nuk ka gjetur asnjë dëshmi se ankuesi pas nënshkrimit të Aktit të Emërimit me numër protokollit 7199-1 të datës 20.10.2021 të ketë ndërmarrë ndonjë veprim juridik lidhur me harmonizimin e koeficientit të pagës apo heshtjes administrative të organit të punësimit lidhur me kërkesën e tij për harmonizim të koeficientit, kështu që Kolegji konstaton se ky pretendim ankimor është i pa bazuar dhe i parashtruar në kundërshtim me nenin 127 paragrafin 1, 3 dhe 4 të Ligjit Nr.05/L-031 për Procedurën e Përgjithshme Administrative andaj edhe u vendos si në pikën II, të dispozitivit të këtij vendimi.

Andaj, theksuar si më sipër, obligohet Kryeshefi Ekzekutiv dhe Udhëheqësi i Burimeve Njerëzore në Agjencinë e Ushqimit dhe Veterinarisë, që brenda afatit prej pesëmbëdhjetë (15) ditësh nga data e pranimit të këtij vendimi, të ndërmarrin të gjitha veprimet e nevojshme ligjore-administrative për harmonizimin e koeficientit të ankuesit nga koeficienti gjashtë (6) në tetë (8).

Siç u theksua me sipër, Kolegji duke u bazuar në nenin 18 paragrafin 1 nën paragrafin 1.3 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës, vendosi si në dispozitiv të këtij vendimi.

Vendimi hyn në fuqi ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIQYRËS PËR SHËRBIMIN CIVIL TË KOSOVËS

Lënda, A.nr.917/2022, datë 01/12/2022.

Ardita Perçuku-SHYTI

Zyrtare e Lartë për Bashkëpunim Profesional

Arben MEHMETI

Kryetari i Kolegjit



Vendimi i dërgohet:

- Ankuesit,
- Kryeshefit Ekzekutiv në Agjencinë e Ushqimit dhe Veterinarisë;
- Udhëheqësit të Personelit në Agjencinë e Ushqimit dhe Veterinarisë dhe
- Arkivit të KPMSHCK-së.

